

کچرکن اوراده برافش اولدینی محافظین عسکرلرینه هجوم ایچون اطرافدن کلان اهل قیام و محلی اسلام فی ۵ آغستوسده دشمنک محافظین مرقومه سنک چوغیسینی اتلاف ایتمشدر. ایروده زه نیچه قصبه سی جوارنده تحشد ایتمش اولان مجاهدین فیلیپوویچک اردوسیله فی ۷ آغستوسده وقوعبولان جنگ وجدالده طرفیندن ایچه تلفات وقوعبولمشدر.

فیلیپوویچ اردوسیله اورادن زه نیچه قصبه سنه فی ۱۱ آغستوسده بلا حرب واصل اولوب اردوسندن اون قدر طاہور پیاده و بیٹ قدر سوازی واون ایکی طاغ طوبی تفریق ایدوب قاقان دویوی وویسوقه قصبه سی جواریلده طوعریچه سرای بوسنه شهرینه کیتک اوزره ترتیب ایدهرک سوق ایلدی.

کندیسی بنالوقه دن مرتب عسا کرک یاچه قصبه سی و تراونیک شهری اوزرندن قومپسانیا حانی موقعه کلنجبه دکن مذکور زه نیچه قصبه سنده توقف ایتمشدر.

بنالوقه دن حرکت ایدن فرقه عسکریه سی یاچه قصبه سنه قریب میلہ ساحه سنده بورچی موقعه دن فی ۷ آغستوسده اهل قیام و بونره تابع بر مقدار عثمانلی عسکری مدافعلرینه تصادف ایدوب یدی ساعت قدر دوام ایدن حرب و قتالده دشمن عسکری غلبه ایدوب مذکور یاچه قلعه سی دخی ضبط ایتدیلر. واورادن بلا حرب آوستریا عسکری ۱۱ آغستوسده تراونیک شهرینه داخل اولدی. مذکور بورچی موقعی جنگنده اظهار ثبات و شجیعانه غیرت ایدنلردن یاچه لی جابی زاده محمد بک و تراونیکلی قونان زاده حاجی درویش بک شهید اولمشدر.

آوستریا اردوسی ایرویه حرکت و دوامی حالنده زمانک تراکتته بناء سرای بوسنه شهرینک خرابیتنه بادی اولابیله جکی مطالعه سیله آنک زه نیچه دن ایرویه حرکتی پروتستو و بولوندینی محله توقف ایتسینی رجا ایلکده اولدقلری مألنده سرای بوسنه ده اداره امور اهل قیام رئیس طاشلیجه لی سلمان پاشا زاده اسماعیل حق بک و ولایتوویچ لویو حاجی حافظ صالح افندی و همپالرینک ترتیب و تحریر ایتدکری مذکور پروتستونامه ایله مذکور سرای

بوسنه شهرندن حرکت ایدن علی قاضی زاده فهم افندی و حافظوویچ ( نام دیگر ناقو ) احمد افندی و تجاران معتبراندن حلاج زاده حاجی عبدی آغا و عسا کر ضبطیه میرالای خلیل بک و یقین و قنده بوسنه ولایتی والی و قوماندانلغه تعیین اولوب مواصلت ایدن حافظ پاشا فی ۱۲ آغستوس تاریخنده مذکور زه نیچه قصبه سنه واصل اولوب پروتستونامه مزبوریه یی جنرال فیلیپوویچ تسلیم ایتمشر ایسده مومی الیه مامور اولدینی خدمتی اجرا ایتکه مجبور اولدینندن بختله بویله بر پروتستونامه یه اهمیت و یرمیه جفی افاده ایله استرحاملرینی رد ایتسی اوزرینه اوندرده سرای بوسنه یه عودت ایلدیلر.

سرای بوسنه دن حاجی یماقوویچ محمد افندینک قومانداسیله قاقان دویویده تحشد ایتمش اولان اسلام مدافعلری اوزرینه فی ۱۵ آغستوسده هجوم ایدن دشمن عسکرله اولنان جنگ وجدالده منتظم و طویلر ایله مجبور دشمن قوتنه تاب آور اوله میوب ایچه تلفاتدن صو کره دشمن غلبه ایدوب عسکری دخی ۱۷ آغستوسده ویسوقه قصبه سنه داخل و آندن ووغوشته جاده سیله سرای بوسنه شهرینه یکر می دقیقه مسافه ده واقع اولان قوبیلا غلاوا قریه و بایرینه ۱۸ آغستوسده واصل اولدی.

مذکور قاقان دویوی حربنده سرای بوسنه دن جافیک محمد آغا و دفتر داری زاده محرم آغا و بلغرادلی دیمکله معروف حاجی آدم آغا شهید اولمشدر. تراونیکدن حرکت ایدن آوستریا فرقه عسکریه سی وزه نیچه دن قاقان جنرال فیلیپوویچ اردوسی مذکور قومپانیا موقعه دن ۱۴ آغستوسده برلشوب اورادن بوصو و اچه قصبه سی اوزرندن حرکت و فوینیچه قضا سنده واقع قلو قوت بوغازینه قریب محله ۱۵ آغستوسده واصل اولایلر.

بو کوندرده سرای بوسنه شهرینه التجا و تجمع ایدن مجاهدین و شهر مذکور دن قالدیریریلان محاربین تقریباً اون ایکی بیک پیاده و بش بیک قدر سواری و آلتی صحرا واون قدر طاغ طوبی اولوب اسلام اردوسی قوماندانی طاشلیجه لی اسماعیل بک و بر قاج عثمانلی ضابطانک ترتیبیه مذکور قلو قوت بوغازی جاده سنده طوپراقدن یاپیلان استحکاملره وضع ویرلشوب اوراسی